



OPĆINA TEŠANJ

BUDŽET za GRAĐANE 2024



www.opcina-tesanj.ba

UVODNA RIJEČ NAČELNIKA

SUADA HUSKIĆA



Zbog čega Budžet za građane

Dragi sugrađani,

Ustaljena praksa naše Općine je da građanima predstavljamo Budžet na ovakav način, kroz svojevrsan vodič koji pojednostavljeno prikazuje kako se planira prikupiti i trošiti novac iz budžeta Općine tokom budžetske godine.

Vodič je namijenjen svima koji žele da se upoznaju sa procesom budžetiranja, učestvuju u javnoj raspravi, prate realizaciju općinskih ciljeva i finansiranja svih aktivnosti koje se podržavaju općinskim budžetom.

Cilj ovakvog pristupa je da se javnosti omogući bolji uvid i razumijevanje načina na koji lokalne vlasti planiraju, prikupljaju, raspodjeljuju i troše sredstva iz budžeta Općine.

Za razliku od proteklih godina, ove godine smo se fokusirali na predstavljanje projekata koje planiramo realizovati, dok je nadležnostima i uopšte procesu budžetiranja posvećen manji prostor u okviru drugog dijela.

Pokazalo se da ovakav naš pristup doprinosi značajnijem uključenju građana u proces donošenja budžeta, a to pokazuju i rezultati sa protekle javne rasprave. Budžet je nakon javne rasprave za 2024. godinu izmijenjen za 3,1 miliona KM, prihvaćeno je 33 prijedloga i primjedbe od ukupno 81 iznesenih, uz mogućnost provođenja niza drugih kroz postojeće budžetske stavke, a u javnoj raspravi je učešće uzelo 69 lica.


Nadam se da ćemo na ovaj način budžet učiniti pristupačnijim i razumljivijim, te omogućiti informacije za još veće i značajnije učešće građana u javnoj raspravi i izradi budžeta u narednim godinama.

s.r. Suad Huskić

Struktura prihoda 2024.

Budžet Općine Tešanj za 2024. godinu iznosi **28.025.000 KM.**

Struktura prihoda za 2024. godinu izgleda ovako:




Raspodjela budžetskih sredstava

Budžet Općine Tešanj za 2024. godinu iznosi **28.025.000 KM**, a raspoređuje se na pojedinačne namjene koje su definisane izvornim i prenesenim nadležnostima Općine.

Budžetska sredstva se raspoređuju na slijedeći način:

- * **20%** za funkcionisanje organa uprave (troškovi uposlenih i materijalni troškovi službi i Vijeća),
- * **10%** za opštredruštvene potrebe (održavanje putne i druge infrastrukture sa komunalnim potrebama),
- * **24%** za **tekuće grantove** (namjenski dodijeljena budžetska sredstva pojedincima, javnom i nevladinom sektoru za pomoći, projekte i aktivnosti) i
- * **46%** za kapitalna ulaganja i povrat kredita.

Struktura raspodjele za 2024. godinu izgleda ovako:





Kapitalna ulaganja u 2024.

(45% budžetskih sredstva)

Najveći dio Budžeta (12.581.000 KM) se izdvaja za kapitalna ulaganja.

Struktura kapitalnih ulaganja za 2024. godinu izgleda ovako:



* 45% općinskih prihoda za 2023. godinu je usmjereno na kapitalna ulaganja.

* 31% kapitalnih ulaganja je usmjereno na projekte komunalne infrastrukture.

KORIDOR 5c - TEŠANJ ↑



Gradnja autoputa na koridoru Vc – dionica kroz Tešnja predstavlja najveći infrastrukturni projekt na teritoriji Tešnja.

Projekt se odvija u dva dijela:

-Prva dionica Putnikovo Brdo – Medakovo u dužini 8,5 kilometara, vrijednosti 167 miliona eura.

-Druga dionica Medakovo – Ozimica dužine 21,3 kilometra, ukupne vrijednosti 361,75 miliona eura.

Rok završetka obje dionice je 2025. godina, od kada će Tešanj, petljom u Medakovu, biti direktno povezan i otvoren i prema sjeveru i prema jugu. Nakon izgradnje, Tešanj će biti autoputom povezano sa Sarajevom

(Briješće) 131 km; Zagrebom via Gradiška 254 km - via Svilaj 280 km; Beogradom (most Gazela) 253 km i mrežom autoputeva po cijeloj Evropi.



Općina je u proteklom periodu nizom pregovora i aktivnosti izdejstvovala da se u sklopu ovog projekta dodatno uredi korita rijeka Usore i Tešanjke, rekonstruiše saobraćajnica Tešanj - Medakovo - Tešanjka, saobraćajnica Jablanica-Trepče. Takođe će se izmjestiti dio puta M4 Banjaluka-Doboj.

Općina je, pored ostalog, obezbijedila 400.000 KM sredstava za podršku projektima proizašlim iz realizacije projekta izgradnje autoputa na koridoru Vc. Već ranije je kroz budžet obezbijedila sredstva

za eksproprijaciju zemljišta za novu trasu puta Tešanj - Tešanjka, odlagalište materijala i dio projektovanja, kao i svu tehničku podršku i koordinaciju sa MZ. Provedene eksproprijacije su obezbijedile priliv sredstava na ove prostore u visini od cca. 30 miliona KM. Pored toga, obezbjeđuje se i posao za firme podizvođače sa teritorije Tešnja, kao i druga potrošnja koja se vezuje za boravak i rad radnika, te materijale i robe s ovih prostora.

Odvodnja i prečišćavanje otpadnih voda predstavlja i dalje najveći infrastrukturni projekt koji direktno realizuje Općine Tešanj. Ukupna vrijednost projekta iznosit će više od 25 miliona KM. Do sada je za realizaciju projekta izdvojeno cca. **15 miliona KM.**

U 2024. godini se predviđa nastavak gradnje mreže u visini od **2.200.000 KM.**

U okviru komunalne infrastrukture, planirana su i ulaganja u projekte **vodosnabdijevanja** u ukupnoj visini od **1.500.000 KM.**

Sredstva su namijenjena za obezbjeđenje dodatnih količina vode i dalji razvoj mreže. U proteklih 9 godina je uloženo u ovu infrastrukturu **6,7 miliona KM.**



Pored komunalne infrastrukture, najznačajnija ulaganja se planiraju kroz:



* Asfaltiranje i drugi projekti mjesnih zajednica kroz plan kapitalnih investicija od 1.300.000 KM.

* Opremanje civilne zaštite i PVJ Tešanj od 607.000 KM

* Gradnja sportske dvorane Jelah - završni radovi od 1.250.000 KM.

* Gradnja OŠ Medakovo od 700.000 KM + 300.000 KM iz dodatnih grant sredstava.

* Uređenje industrijskih zona Bukva i Glinište 540.000 KM.

* Gradnja dječijih igrališta u Tešnju i Jelahu 310.000 KM.



Planiran je i nastavak aktivnosti na:



- * Sanaciji Starog grada od 112.000 KM
- * Otkupu zemljišta za realizaciju kapitalnih projekata od 300.000 KM
- * Centralnom spomen obilježju, revitalizaciji Usore, izletištu Kiseljak, zaštitnim ogradama i sl. 230.000 KM
- * Izradi prostorno-planske i projektne dokumentacije od 320.000 KM
- * Projektima iz grant sredstava i učešće Općine u projektima drugih nivoa vlast i izvora, od 590.000 KM
- * Dodjeli grantova za realizaciju projekata ustanovama i organizacijama od 1.077.000 KM i drugo

Grantovi u 2024.

Grantovi predstavljaju budžetska sredstva koja se dodjeljuju pojedincima, te javnom i nevladinom sektoru za pomoći, finansiranje projekata i aktivnosti.



Grantovi predstavljaju specifičan vid povrata sredstava poreznih obveznika u društvene tokove (građanima, udruženjima građana, sportskim klubovima, privrednicima, mladima, studentima, javnim ustanovama i slično).

Grantovi se dodjeljuju putem javnih poziva (privredni podsticaji, stipendije, projekti udruženja građana, sportskih klubova i sl.), posredstvom udruženja i javnih ustanova (grantovi socijalne pomoći i sl.), kandidovanjem projekata i učešćem u programima koje organizuju nadležne Službe (manifestacije i obilježavanje značajnih datuma Općine), te pojedinačnih zahtjeva.

* **23,85%**
budžetskih
rashoda čine
tekući grantovi
(≈ 6,7 miliona KM)

* **27,33%** svih
tekućih grantova
čine grantovi
socijalne zaštite
(≈1,83 miliona KM)

Sredstva grantova za 2024. godinu iznose 6.683.000 KM, a dijele se na slijedeće namjene:



*** Izdvajanja za socijalnu zaštitu čine 27,33% svih grantova Općine.**

Ova izdvajanja obuhvataju širok spektar pomoći iskazan u narednoj tabeli:

GRANTOVI SOCIJALNE ZAŠTITE	IZNOS
Grant Centru za socijalni rad Tešanj	517.000
Jednokratne pomoći dodijeljene putem vladinog i nevladinog sektora	363.000
Sredstva za ostale pomoći boračkih populacija iz Budžeta ZDK	310.000
Sredstva za stambeno zbrinjavanje	90.000
Stalne socijalne pomoći Centra za socijalni rad i ogrjev	123.000
Sredstva za privremeno angažovanje nezaposlenih lica	29.500
Grant za dnevni boravak djece sa poteškoćama u razvoju	40.000
Sredstava za pomoć povratku raseljenih i izbjeglih lica	30.000
Poboljšanje uslova za srednje obrazovanje učenika-prijevoz đaka	85.000
Stimulativne demografske mjere	70.000
Pomoći djeci oboljeloj od specifičnih teških oboljenja i celijakije	50.000
Subvencije penzionerima, crveni križ i drugo	119.000
SVEGA	1.826.500



*** Grantovi za kulturu, obrazovanje i mlade iznose 1.434.500 KM.**

Iz ovih sredstva se finansiraju projekti mladih, aktivnosti udruženja iz oblasti kulture, rad Centra za kulturu i obrazovanje Tešanj, općinske manifestacije, podržavaju se javne ustanove koje se finansiraju iz Budžeta ZE-DO kantona (osnovne i srednje škole, Biblioteka, Muzej Tešanj, Memorijalni centar Srebrenica) i drugo.

Sredstva za ove namjene su u odnosu na 2023. godinu uvećana za 14%.





530.000 KM iznose sredstva koja se u 2024. godini izdvajaju za **stipendiranje studija**.

Općinska podrška sa stipendijama Ministarstva obrazovanja ZDK iznosi 300.000 KM, a boračke stipendije Kantona 230.000 KM.

Stipendiranjem će biti obuhvaćeno oko **400 studenata** sa teritorije Tešnja.

U proteklih 15 godina za stipendiranje studija redovnih studenata izdvojeno je više od **7,1 miliona KM**.

U okviru Budžeta namijenjenog za grantove planirano je izdvajanje **755.000 KM** sredstva direktne **podrške privredi**. Između ostalog izdvajaju se sredstva prema programima za samozapošljavanje i zapošljavanje od 130.000 KM, sredstva za poslovne ideje od 110.000 KM, podršku sajamskim aktivnostima od 55.000 KM.

Grantovi za razvoj poljoprivrede za 2024. godinu su planirani u visini od **380.000 KM**. Podsticaji su podijeljeni na biljnu i animalnu proizvodnju i dodjeljivat će se svim registrovanim gazdinstvima koja ispunjavaju uslove iz općinskog Programa.

Pored toga planirana su i sredstva podrške sjetvi i drugim projektima u oblasti poljoprivrede u visini od **80.000 KM**.

Proteklih 18 godina iz budžeta je ovim putem izdvojeno i dodijeljeno više od **5,85 miliona KM**.

Poticajima je obuhvaćeno oko **400 domaćinstava** godišnje.





681.000 KM iz Budžeta Općine se izdvaja za sufinansiranje rada **sportskih kolektiva** i sporta uopšte. Najveći dio sredstava se izdvaja za finansiranje takmičarskih aktivnosti prema projektom pristupu - 500.000 KM.

Dio od 90.000 KM se izdvaja za obezbjeđenje termina za trenažni proces klubova putem Sportsko rekreacionog centra Tešanj.



Udruženja građana su zastupljena u budžetu sa 378.000 KM. Od toga, sredstva od 185.000 KM su namijenjena za finansiranje rada udruženja od posebnog značaja za Općinu i finansiranje prema projektom pristupu objavom javnog poziva.

Drugi dio od 193.000 KM udruženja ostvaruju kroz grantove pomoći članstvu u okviru socijalnih izdvajanja, a takođe učestvuju u realizaciji drugih programa koji se finansiraju iz Budžeta Općine. Takođe, putem nadležne općinske Službe ostvaruju i druge vidove pomoći u realizaciji svojih aktivnosti (sajamske aktivnosti, programi edukacija i slično).

Dodjela sredstava se u značajnoj mjeri vrši putem provođenja Javnog poziva.

Operativna **budžetska rezerva** čini 0,54% budžeta i koristi se za nepredviđene i nedovoljno predviđene izdatke.

Dva puta godišnje se izvještava Općinsko vijeće o korištenju sredstava rezerve sa pregledom svih isplata.



Opštedruštvene potrebe

Opštedruštvene potrebe obuhvataju niz aktivnosti Općine vezane za komunalno uređenje, održavanje infrastrukture, bezbjednost i druge potrebe zajednice.



Komunalno uređenje je isključiva nadležnost lokalne uprave.


Shodno tome, za ove namjene se iz općinskog budžeta izdvajaju sredstva od **475.000 KM**.

Uređenje obuhvata niz aktivnosti na čišćenju ulica, uređenju javnih površina, uklanjanju divljih deponija, čišćenju korita rijeka i šljunkohvata i slično. Najveći dio aktivnosti se ugovara sa nadležnim javnim preduzećem. Pored toga, zbrinjavanju pasa lualica i uređenju fasada je regulisano kroz grant sredstva od 220.000 KM.

Održavanje i unapređenje putne infrastrukture iziskuje **1.320.000 KM**.

Blizu **70%** ovog iznosa obezbjeđuje se iz namjenskih sredstva. Nadležna općinska Služba održava **367 km** putne mreže, od čega je asfaltna mreža dužine **266 km**. Ovo ne uključuje regionalne magistralne putne pravce. Visina izdvojenih sredstava je uslovljena veličinom mreže i potrebom osiguranja bezbjednosti u saobraćaju. Shodno tome, tokom godine se vrši sanacija oštećenja asfaltnih površina, postavljanje signalizacije, nasipanje makadamskih puteva, čišćenje kanala, propusta i putnog pojasa, ucjevljenja, obilježavanje taxi stajališta, te zimsko održavanje.





Javna rasvjeta se nalazi u vrhu interesovanja građana, budući da iskazuju spremnost za 100%-tno finansiranje izgradnje. Po izgradnji samih objekata finansiranje utroška se vrši iz općinskog budžeta. Općina za ovu godinu izdvaja za potrošnju električne energije **440.000 KM**, dok je za održavanje i unapređenje mreže planirano **70.000 KM**.

Iz ovih sredstava se finansiraju **102** mjerna mjesta sa **7.874** rasvjetna tijela.

Pored toga vrši se održavanje autobuskih stajališta, zaštitnih ograda, dječijih igrališta, spomen obilježja.

Redovno se provode mjere deratizacije, kontrola voda na javnim česmama i drugo.

Iz namjenskih sredstava za zaštitu i spašavanje planirana su uređenja korita rijeka, sanacije klizišta i dr. aktivnosti Službe civilne zaštite od 340.000 KM.



Rad organa uprave

Za funkcionisanje organa uprave izdvaja se 20,07% budžeta, od čega 14,63% za troškove uposlenih i 5,45% za materijalne rashode uprave sa Općinskim vijećem.



Materijalni troškovi iznose 1.526.000 KM. Dio ovih troškova čine standardni rashodi električne energije, grijanja, ptt usluga i slično.

S druge strane ovi troškovi obuhvataju naknade volonterima, naknade za rad općinskih komisija, rad Općinske izborne komisije, naknade općinskim vijećnicima, informisanje o radu uprave i Općinskog vijeća, troškove stručnog usavršavanja, i drugo.



Ovo je jedan dio informacija o općinskom budžetu.
Mišljenje o ovoj aplikaciji,
eventualne upite, prijedloge i sugestije možete dostaviti na
budzet@opcina-tesanj.ba.

SUDJELUJTE u izradi budžeta, to je vaše PRAVO.

TEHNOLOŠKI KABINET TRA TEŠANJ



TECH-LAB TEŠANJ